

得耕堂政書

第十三册

退耕堂政書卷二十七目錄

奏議二十七

東三省憲兵畢業編隊摺

長白設治撥款片

遵旨核減擬保剿匪人員摺

奉天巡防隊薪餉請照原奏數目支給摺

遵章變通辦理東三省陸軍測繪學堂摺

整頓黑牛館清查款項報銷摺

移設黑牛館片

遵旨請獎延吉邊務出力各員摺

吉林開辦官運已著成效摺

吉省改編巡防隊並派大員督辦防剿摺

已革佐領豐年吞款監追片

遵議陝西設立鐵路公司選舉總理分別准駁摺

會議御史石長信奏請製造諸工量予實職摺

勘查洛潼路綫股資情形摺

驗收京門枝路工程情形摺

退耕堂政書卷二十七

天津徐世昌

奏議卷二十七

東三省憲兵畢業編隊摺

奏爲憲兵畢業編成憲兵隊以維軍紀而便糾察恭摺仰祈
聖鑒事竊臣等前奏設東三省憲兵學堂於光緒三十三年十月
開辦原定畢業期限一年經臣等督飭該堂監督等按照所定學
術各科認真教練復令展限三箇月補習功課實行演習軍事裁
判至上年年終爲止頭班畢業並以憲兵需用甚廣一班不敷分
布本年正月添招二班業將籌畫詳情咨部在案查三省現有陸
軍將及三鎮之數分途駐紮糾察宜周而介居兩強觀瞻所繫軍
紀尤當嚴整矧東省情勢迴殊設有兵力所不能及之處亦賴憲

兵以爲補助是此項憲兵隊益須早日編成於紀律既可維持於外界兼資抵制當經參照部定陸軍警察隊章程先將此次頭班畢業生二百餘名編爲憲兵四隊分派各處俟二班畢業後共擬編成三營並仍暫名憲兵以便分駐邊要免招疑忌至現成四隊所需薪公餉乾以及開辦雜支各經費爲數甚鉅擬暫爲設法籌撥俟二班畢業學堂停辦卽以奏准原撥該堂常年經費銀三萬四千一百八十餘兩作爲憲兵隊餉項底款不敷之數再行設法另籌將來三營成立仍須籌定的款以期持久除將章制咨部查照外所有編成憲兵隊緣由謹恭摺具奏伏乞

皇上聖鑒

長白設治撥款片

再前因奉天臨江縣迤東邊境遼闊請添設府治以固邊防而資

控馭業經奏明奉

旨允准在案遵卽遴派設治委員調奉同知李廷玉直隸州知州張鳳臺帶同通譯測繪暨其他辦事人員先後馳往籌辦陸續勘劃長臨府縣界址並奉吉兩省省界隨卽招募工兵開山修路建置衙署市房學堂警局監獄以及關於鴨綠江航權應行備辦各事均已次第成立計用過開辦經費銀十餘萬兩尙有續修工程並籌備奉吉邊境擬設縣治應需費用合之文武員弁薪水津貼餉乾常年各款額支活支爲數亦鉅臣等查長白府治扼鴨綠江上游與日人極意經營之惠山鎮隔江對立非便利交通無以資鎮守非實行新政無以策治安地初闢則規模不宜苟簡民初聚則設備俱應代謀加以該境氣候多寒市商寥落際茲草萊初啟一切物料轉運工本皆屬昂貴其規畫設治情形不同故需用經

費亦難與他處相提並論雖值庫藏支絀之時止期款不虛糜斷難惜款廢事迭由臣等飭司撥定專款作正開銷分飭在事員司趕緊興辦樽節動支一俟設治事竣再行核實造報細數除咨部立案外謹附片具陳伏乞

聖鑒

遵 旨核減擬保剿匪人員摺

奏爲覆核剿辦蜂密山鬍匪及各路軍隊剿辦華俄巨匪出力文職各員遵已刪減仍懇查照歷辦成案分別異常尋常給予獎勵恭摺仰祈

聖鑒事竊臣等本年二月二十四日奏請將剿辦蜂密山一帶鬍匪出力各員並各路軍隊剿辦華俄大股巨匪出力各員彙案獎敘一摺於是月三十日奉

硃批該部議奏單二件并發欽此旋准吏部議覆引東省拏獲馬賊統按尋常勞績給獎舊案指飭此次擬保各員人數過多令核實刪減統按尋常勞績奏獎等因於閏二月二十二日具奏奉旨依議欽此欽遵知照前來臣等伏查東三省當海陸交衝拱衛神京爲根本重地鬍匪積年鴟張凶悍蔓延屢誅不盡爲害最烈不特民生荼毒擾亂治安往往牽涉外交生種種之困難從前俄人每以捕匪保商爲名陰行其侵略政策卽此次俄商郭列一利喀被擄勒贖羌帖七十萬俄人電致外務部嘖有煩言迨經各路軍隊奪回則函電聲謝忭舞臚歡是其明證因思內訌不靖外患因以環生關係至爲重大與他省尋常剿匪迥焉不同况絕徼荒寒山林邃密艱險勞苦倍逾腹地實非優賞無以鼓在事之心而作方新之氣是以光緒三十三年正月前將軍臣趙爾巽奏請變

通定章嗣後凡有剿匪出力人員仍隨時彙案辦理旋因奉北一帶剿匪出力各員以異常勞績請獎者九十一員尋常五十二員臣等復於光緒三十四年三月十一月先後將吉省蒙邊各防營剿匪出力人員亦分別請獎異常八十六員及四十員尋常八十七員及三十三員均蒙

天恩奉

旨允准各在案凡屬在事人員同深感奮自此各路剿捕策勵益加暑雨祁寒窮搜罔懈或督率於前軍或轉運於後路往往逼臨匪穴及遇伏被圍該員等輒躬先士卒冒險衝鋒出入於槍林彈雨之中崎嶇於叢莽沙磧之徑其困憊險危之狀攻守剿捕之勞實與臨大敵無異計擒斬首要掃除巢穴較之光緒三十二三年之績爲尤多此次按照異常尋常分別請獎實係按照近年成案

而非此實無以激勵人才也至請獎人數過多之故則以此次自夏徂冬旁搜深入遠之至於海參崴埠以及黑龍江省之通肯地方上起遼錦中經哈濱下訖俄邊之五站一帶事兼三省縱橫數千里歷時數閱月剿捕數十起先後擒斬大股首夥五百餘名救回華俄商民二百四十餘人非若三十四年三月十一月請獎案內各就吉省或蒙邊一方面而言是以案多而人數亦眾此次請獎各員業經再四嚴核實已無稍冒濫第既經該部奏准核實刪減自不得不欽遵辦理茲謹再行勉爲刪減計共減去十七員又由異常改爲尋常者三員另繕清單恭呈

御覽伏乞

聖恩准如所請給獎出自

逾格鴻施至此次請獎武職員弁亦先經臣等切實刪汰悉屬論

功應獎之員可否仰懇

天恩飭下陸軍部准照原案單開原數分別給獎以仰體

聖明眷顧

陪都鼓舞羣才之至意所有覆核剿辦蜂蜜山鬍匪及各路軍隊剿辦華俄巨匪出力文職各員遵已刪減仍懇查照歷辦成案分別異常尋常給予獎勵各緣由謹恭摺覆陳伏乞

皇上聖鑒

奉天巡防隊薪餉請照原奏數目支給摺

奏爲奉天巡防隊將士苦累請照原奏數目支給薪餉以示體恤而資整頓恭摺覆陳仰祈

聖鑒事竊准陸軍部咨宣統元年二月二十六日陸軍部會同度支部具奏議覆奉省各軍遵照新章改編巡防隊一摺本日奉

旨依議欽此欽遵恭錄並鈔奏咨行前來仰見

朝廷重視邊防部臣慎籌

國帑之至意伏讀之下悚佩莫名伏維奉天爲根本重地整軍爲目前要圖值屢經兵燹之餘乘物力艱難之會欲除軍人積弊必使廩餼足以自給而後可執法以相繩欲作尙武精神必有重祿以勸有功而後知感激以圖報此中因地因時宜輕宜重有不得不酌量變通以求一當者請就部議爲我

皇上分晰陳之如部議奉天巡防隊劃分各路原奏祇云劃分五路並未詳敘駐紮處所應將布置情形繪圖貼說咨部考核一節查奉天比年以來盜匪尙形充斥每值防剿吃緊之際徵調頻仍巡防區域朝夕時有更代擬俟剿匪事務稍鬆營隊各歸本路卽將編配駐紮情形詳細繪具圖說咨部立案以資考證如部議諳

習新操舊軍編成步隊一標令將成軍日期及一切章程繕具清冊送部備查一節查新舊軍性質迥殊作用亦異前訓練成軍時已於光緒三十四年十二月十八日附片陳明在案自應聽候部示另案辦理如部議令將河防一營章制報部核定以重戎政一節查河防營與巡防隊本不相屬前於光緒三十二年創設河防之初是年十月二十三日業經前任將軍趙爾巽奏咨有案惟巡防隊既經改編河防營亦有應行更定之處擬俟議定章程另案奏咨辦理至如部議從前奉軍八路薪餉章程一切從優各路統領月支薪公銀二百五十兩各營步兵月支正餉四兩津貼一兩現在該省改訂餉章正兵支數已照陸軍章程減爲四兩五錢而統領支數轉照陸軍章程加爲五百兩其他支數大率比照陸軍支給財力有限協濟爲難該省未便任意開支行令核實釐定一

節查奉天舊章統領月支薪公銀二百五十兩步兵月支正餉四兩津貼一兩統領月支之數核之尋常物價實在不免賠累步兵月支五兩服裝均係自備亦屬苦累不堪統帥之所不足不能不攤之於兵營兵之所不足不能不擾之於民其勢使然積習已久現在既有陸軍部章程可循是以改定統領加爲五百兩月中所得亦不過僅足敷用營兵之減爲四兩五錢者並非薄於待兵特不欲使舊軍月支之數較諸新軍加多然服裝一切均由官中給發合而計之亦較從前爲優自上年遵章編併改定餉章以後營務頗有起色昔年積弊一洗而空其效固已彰彰可考至其他支數大率比照陸軍支給原以陸軍部所定章程於軍事界上斟酌盡善諸事援照辦理期與部章不背方今籌款維艱臣亦極思力加核減無如奉省百物昂貴又在防剿用兵之際使不先足其餉

正書卷二十一
二
糴其何以勵將材而端兵習若謂任意開支致多糜費臣雖至愚何敢出此合無仰懇

天恩俯念奉天巡防隊將士苦累情形准照原定數目支給薪餉以示體恤一俟奉天物價稍平再行核實酌減俾免虛糜而符部議除咨部查照外理合恭摺覆陳伏乞

皇上聖鑒施行

遵章變通辦理東三省陸軍測繪學堂摺

奏爲遵章變通辦理東三省陸軍測繪學堂以資軍用恭摺具陳仰祈

聖鑒事竊臣等前因東省幅員遼廓極須預儲測繪人材曾於上年陸軍部奏定測繪學堂章程未經頒發以前奉吉兩省各先試辦學堂一所業經附片奏明俟此班畢業後再行遵章辦理仰蒙

俞允在案本年二月各該堂內學期奉省扣足一年半吉省扣足
二年均經先後嚴密考試舉行畢業暫編測量一隊除將各該堂
分別停辦全堂職員應俟查照咨部章程擇尤另案奏請給獎以
昭激勸外亟應遵照部章續行辦理以符定制查陸軍部原奏內
稱此項學堂各省均應設立俾籌款既能分任收效亦可剋期計
畫極爲完善惟是東三省情勢實與內地懸殊凡關於軍事之局
處學堂均經公同合辦藉省經費現在陸軍測繪學堂事同一律
因將吉省原有測繪學堂歸併奉省一處名曰東三省陸軍測繪
學堂仍責成督練處參謀處總辦管雲臣總司其事以資熟手學
生飭由三省考選自不能不變通部定額數酌量增加現分爲奉
天八十名吉林四十八名黑龍江三十二名共計額設學生一百
六十名業經照章於本年正月下旬招考第以開學之始應按原

正書卷二十一
定額數增收學生若干名俟甄別後分別去留以符原額其堂中經費業飭按照部定學生員司總數比例增減撙節動用惟該堂係合三省設立額設學生一百六十名幾及部章一省定額之倍各項經費自應以次遞增益以東省氣候苦寒百物翔貴其學生員司等並應酌加伙食津貼銀兩以協時宜而示體恤至該堂每年額支活支各款已飭由東三省支應處撥給均係實用實銷按期具報除咨部查照外所有遵章變通辦理東三省陸軍測繪學堂緣由謹合詞恭摺具奏伏乞

皇上聖鑒訓示

整頓黑牛館清查款項報銷摺

奏爲整頓黑牛館清查款項覈造報銷恭摺仰祈

聖鑒事竊臣等上年奏整頓黑牛館辦法摺內曾經聲明所有光